



*Kamis, 30 Oktober 2021*

**Ogen: ESTER 2:8-9**



**Rencana Dibata Si La Terukuri**



**E**ster e me kap anak bangsa Israel si tading i bas pembuangan i Persia. Ester ras kerina kade-kadena e me kalak tabanen perang, bangsa terbuang i bas negeri kalak. Nggeluh sebagai bangsa budak, la lit hakna ras megati iperlakukan la adil. Sabap selaku bangsa buangen uga pe la pas, mesera kegeluhen pe salah, bicara lit sitik persikapna pe jadi pandangan. I bas sada paksa mate me kemberahen Raja Persia bas masa e, e me ratu Wasti. Erkiteken kerajan la banci la lit kemberahen rajana, ipilih me piga-piga diberu si mejilena gelahna jadi kemberahen raja. Perban jilena Ester, rupana mpeturah ate jadi janah perbahanenna pe mehuli. Alu proses seleksi si tuhu-tuhu ndekah lit sada tahun, perban karunia rupa mejile ras biak si mehuli i bas Ester, ipilih raja me ia jadi kemberahen. Amin gia la ieteh raja maka Ester e kalak Jahudi, i je icidahken man banta maka adi Dibata enggo ersura-sura kai pe banci ijadikenNa. Si meteruk ukurna ipeganjangken Dibata. RancanganNa la terukuri kita, tapi ulihna mehuli kal si iberekenNa. Kita pe banci jadi sangana bagi kecibal Ester ras bangsa Israel si deban ndai i bas taneh pembuangan, terbuang, isingkirken, irebut hakta bas kita nari, la iperhitungken kalak, irendahken. Banci pe kecibal geluh sangana metepi, usaha macet, utang mbue man tutupen, biaya anak sekolah ngasak, pinakit la tembe-tembe bas jabunta, si ikelengi kita idilo Dibata. Engkai maka bage Tuhan, ninta daram-daram kerna kai nge sura-sura Tuhan arah dampak geluh si la jore e. Amin bage gia ula aru nandangi rancangan Tuhan. Sabap Rancangan Tuhan e maba dame. I tengah situasi si mesera i je Kuasa Dibata icidahkenNa. I bas kelemahenta i je gegehNa isehkenNa. Ernalemlah saja bana, ikut-ikut dalamNa, si maba kemalem enate man banta.